

Aalajangiiffigisassatut siunnersuut imaattoq Inatsisartut Suleriaasianni § 33 tunngavigalugu matumuuna saqqummiunneqarpoq:

**Una pillugu siunnersuut: Ilisimasortat pillugit inatsisip ilaata Kalaallit Nunaannut atortuulersinneqarnissaanik kunngip peqqussutaa pillugu Kalaallit Nunaanni Namminersorlutik Oqartussat oqaaseqaataat pillugu Inatsisartut aalajangiinissaat**  
(Peqqissutsimut Attaveqarnermullu Naalakkersuisoq)

## 1. Peqqussutip imai

Naalagaaffiup Sinnisaata ilisimasortat pillugit inatsisip ilaata Kalaallit Nunaannut atortuulersinneqarnissaanik kunngip peqqussutaa Søfartsstyrelse sinnerlugu nassiuppaa.

Inatsimmi nr. 618-imi, 12. juni 2013-imeersumi § 4-kkut ilisimasortat pillugit inatsimmi § 40, imm. 2-mik nutaamik ikkussinerup nassatarisaanik ilisimasortat pillugit inatsimmi aalajangersakkat makku Kalaallit Nunaannut atortuulersinneqarsinnaangorput: § 8, § 9, § 11, imm. 3, § 12, § 14, §§-it 16-18, § 19, imm. 3-5, § 20, imm. 1, §§-it 24-33b aamma § 34, imm. 1, 4 aamma 5.

Ilisimasortat pillugit inatsimmi aalajangersakkat taakku kunngip peqqussutissanut missingiutikkut Kalaallit Nunaannut atortuulersinneqarput, aalajangersagaq ataaseq naleqqussarlugu. Taamaalluni kunngip peqqussutaanut missingiummi § 34 Kalaallit Nunaanni pissutsinut naleqqussagaavoq. Tassa imaappoq inatsimmi aalajangersakkanik taaneqartunik unioqutitsineq Kalaallit Nunaanni pinerluttulerineq pillugu inatsit tunngavigalugu pineqaatissiissutigineqarsinnaasoq.

Ilisimasortat pillugit inatsimmi aalajangersakkat pineqartut kunngip peqqussutissaanut missingiutikkut atortuulersinneqarput, taamaallutik ilisimasortat pillugit inatsimmi allannguutit pineqartut ilanngunneqarlutik. Peqqussut taamaalluni ilisimasortat pillugit inatsimmi nr. 567-imi, 9. juni 2006-meersumi aalajangersakkanik taaneqartunik ukunatigut allanngortinneqartunik imaqarpoq:

- Umiarsuit inuttaat pillugit inatsimmi, imarsiornermi ilinniartitaanerit pillugit inatsimmi aamma ilisimasortat pillugit inatsimmi allannguutit pillugit inatsimmi nr. 478-imi, 30. maj 2012-imeersumi § 3.
- Qarasaasiakkut il.il. pinngitsoorani attaveqartussaaneq pillugu inatsimmi aalajangersakkat assigiinngitsut allannguutaat pillugit inatsimmi nr. 1231-imi, 18. december 2012-imeersumi § 64.
- Imarsiorneq pillugu inatsisip inatsisillu assigiinngitsut allat allannguutaat pillugit inatsimmi nr. 618-imi, 12. juni 2013-meersumi § 4 aamma "DanPilot" pillugu inatsimmi nr. 600-mi, 12. juni 2013-imeersumi § 16.

Malittarisassat taakku imaatigut angallannermi isumannaallisaaneq pillugu inatsisip allanngortinneqarneranut ataneqarput, taannalu umiarsuarni issittup imartaani ingerlaarnermikkut umiarsuarmiittunik issitumiluunniit avatangiisinik ulorianartorsiortitsisuni ilimasortaqaartussaataaneq pillugu malittarisassanik aalajangersaanissamut periarfissiivoq.

Ilisimasortat pisinnaasaat il.il. pillugit piumasaqaatit ilisimasortat pillugit inatsimmi aalajangersarneqarput. Taamaattumik Kalaallit Nunaanni ilisimasortaqaartitsisarneq pillugu

kapitali immikkut ittoq ilisimasortat pillugit inatsimmi ikkunneqarsimavoq. Inatsisip allannguutissaatut siunnersuutip manna nassataraa, tassalu Kalaallit Nunaanni inatsisikkut aalajangersagaasumik ilisimasortaqartussaataitanerme ilisimasortat tassaassasut ilisimasortatut akuerisaasut. Inatsisip allanngortinneqarnerata kingornatigut “ilisimasortat” Kalaallit Nunaata imartaani ingerlaarnermut atatillugu siunnersuisutut sulii atorineqarsinnaassapput. Taamaattorli ingerlaarfinni ilisimasortaqartussaataaffiusuni ilisimasortat akuerisaasut atorineqarnissaat piimasaqaataassaaq. Ilisimasortaqartitsinerup “DanPilot”-imit naalagaaffiup pigisaanit ingerlanneqarnissaa piimasaqaataannngilaq, ilisimasortaqartitsiviilli allat, matumani ilisimasortat Kalaallit Nunaanneersut ilanngullugit eqqarsaatigalugit, aamma atorineqarsinnaasussaallutik.

Peqqussut imarsiornermut tunngasunik soqutigisalinnut tusarniaatigineqarsimavoq. Tamanna allannguutiniq nassataqannngilaq.

Naalakkersuisut tamanna tunngavigalugu inassuteqaatigissavaat manna Søfartsstyrelsemut nalunaarutigineqassasoq, tassalu ilisimasortat pillugit inatsisip ilaata Kalaallit Nunaannut atortuulersinneqarnissaanik kunnigip peqqussutaa Kalaallit Nunaanni Namminersorlutik Oqartussat akuerissaallugu aalajangertut.